

Communicaziun da medias digl cumegn da Surses (nr. 07-2020)

Surses: Igl center turistic da Savognin vign fatg pi attractiv

La radunanza communal Surses ò concedia en credit da fr. 960'000.00 per equipar e furmar da nov igl center turistic da Savognin. Las lavours vignan fatgas an vista alla realisaziun digl hotel nov tgi vign davert igl mez 2021 a Savognin. Ultra da chegl ò igl suveran concedia en ulterior credit per sanar ena veia d'acla e gôt ed ò approvo la revisiun parziala digl urden da scola Surses.

Igl center turistic da Savognin duess neir ambellia e neir fatg pi sieir per igls pedunzs e skiunzs. Per tal scopo ò la radunanza communal concedia en credit da total fr. 960'000.00. Siva tgi las pendicularas da Savognin on biagia gl'onn passo ena telecabina nova da Savognin a Tigignas e tgi vign actualmaintg biagia en hotel nov aint igl quartier Grava a Savognin, dovrigl en'adattaziun dall'equipaziun. Igl madem mument duess igl center turistic neir fatg pi attractiv. Uscheia ègl previa da far en passape nov e schlarger en passape existent. I dat ena nova farmada per igl bus da sport ed igl bus da scola. Ultra da chegl vign sano igl Punt Caltgera cun tatger ve da nov en passape per pedunzs e skiunzs, uscheia tgi chels on betg ple da traversar igl punt sen la veia digls vehichels a motor. Er ena pare da lagn viglia e pac bela, tgi sarviva per separar igl passape existent dalla Veia Sandeilas, vign ramplazzada. Alla fegn vign er sano igl tetg d'ena staziun da transfurmaziun ed cun chella caschung vign la fatscheda da chella fludrada cun ena construcziun da lattas. Cun tot chellas maseiras duess igl antier quartier da Grava neir randia pi attractiv per igls indigens e per igls giasts. An connex cun la reveletaziun digl quartier e la construcziun digl hotel è er nia preschanto igl sboz digl concept da traffic e parcar per Savognin.

Ulteriouras decisziuns

La radunanza communal Surses ò approvo sainza cuntervusch en credit d'impegn da fr. 930'000.00 per sanar la veia da Talvangas - Cresta da Lai - Pro Barlegn, sen igl territori digl anteriour cumegn da Riom-Parsonz. Sur quella veia vignan equipadas tranter oter la staziun da mez dallas pendicularas a Tigignas e l'ustareia Roggi's Beizli. Las lavours vignan exequeidas an dus etappas.

Mademaintg sainza cuntervusch ò igl suveran approvo la revisiun parziala dalla lescha da scola. Chella revisiun è stada necessaria cuncheigl tgi la radunanza communal ò decida igl fanadour passo da reintrodueir igl rumantsch surmiran scu lungatg da scola. Tar chella caschung è nia profito da far anc en pêr pacas ulteriouras adattaziuns ve digl urden da scola. La revisiun parziala aintra an vigour sen l'antschatta digl onn da scola 2021/22, siva l'approvaziun antras igl departamaint d'educaziun, cultura ed ambiant digl cantun Grischun.

Ulteriours sclearimaints dat igl mastral Leo Thomann (telefonign 079 405 96 73)

Tinizong, igls 9 d'otgover 2020